


Minister Drs. Paul Croes a participa activamente den recauda fondo "Rescata Kerki 1846"

Kerki Protestant tin mas cu djis balor historico monumental



ORANJESTAD (AAN): "Sigur esaki ta un iniciativa masha bunita di e organisacion cu ta recaudando fondo pa por remodela e kerki den su estado original", asina Minister Drs. Paul Croes di Asuntunan Social, Hubentud y Labor a duna di conoce durante e evento "Rescata Kerki 1846" cu a tuma luga diadomingo ultimo riba Plaza Daniel Leo.

Minister Drs. Paul Croes a subraya e importancia di restauracion di e edificio aki, saliendo for di e punto di bista cu e tabata un di e prome edificacionan construi den centro di Oranjestad, hopi aña pasa. E campaña awor ta pa purba recauda asina tanto fondo posibel pa por haci e trabounan necesario di restauracion



na e edificio.

Separa di e balor historico di e edificio monumental, mester tene cuenta tambe cu aki ta trata di Kerki Protestant, pues e tin un balor religioso tambe. Aki ciudadanonan ta practica nan fe, ta busca sosten y guia religioso pa por tuma e miho decisionnan den nan bida diario. "Y como Minister di Asuntunan Social y di maneho di Hubentud, nos ta considera institutonan asina como un partner den yuda nos apoya ciudadanonan den comunidad mas ainda. Pa nos por tin hobennan ta cana riba e caminda corecto, no ta solamente scolnan, docentenan y mayornan tin un rol pa hunga, pero tambe e tipo di institutonan asina por duna nos un bon man", asina e mandatario a expresa.

Minister Drs. Paul Croes

a bisa di a keda masha contento di a mira un cantidad di boluntario trahando diadomingo, dunando nan aporte pa por yuda recauda fondo pa e Kerki Protestant. Personalmente e mandatario a yega eyan cu su famia y a yuda activamente den haci yamadanan di telefon pa por yuda recauda mas fondo posibel pa Kerki Protestant.

Despues di e evento "Rescata Kerki 1846", ainda por sigui haci donacion, depositando riba e cuentanan di banco CMB: 62716903 - Banco di Caribe: 82380801- Aruba Bank: 2544450190 of por yama libremente na e numbernan di telefon 5821535 of 5602407 for di 9'or di mainta te cu 4 'or di atardi non stop. Tambe por manda un email pa kerki1846@gmail.com of subi nan pagina riba Facebook "Rescata kerki 1846".